

## 每週經課朗誦經文(巴克禮漢羅/教羅)2013/10/20

### 共同經課 - 1 耶利米書三十一章二十七節~三十四節

27 耶和華講，看 ah，日子 beh 到，我 beh hō以色列家 kap 猶大家，人 kap cheng-si<sup>n</sup>，lóng 傳種。28 我早前怎樣專心將 in 拔出、拆毀、chhia 倒、滅無、困苦；亦 beh 照 án-ni 專心將 in 建立、栽種；這是耶和華講 ê。29 當 hiah-ê 日，人無 koh 講，老父食酸 ê 葡萄，kiá<sup>n</sup> ê 嘴齒酸軟。30 ták 人 beh 因為家己 ê 罪來死；見若食酸 ê 葡萄 ê，in ê 嘴齒 beh 軟。31 耶和華講，看 ah，日子 beh 到，我 beh kap 以色列家，猶大家，立新 ê 約：32 m̄是照我 kap in ê 列祖所立 ê 約，tī 我牽 in ê 手，chhoā in 出埃及地 ê 時所立 ê；我雖 bóng 做 in ê 丈夫，in 猶原背我 ê 約；這是耶和華講 ê。33 耶和華講，hiah-ê 日了後，我 kap 以色列家所 beh 立 ê 約是 chit-ê；就是我 beh 用我 ê 律法 hē tī in ê 心內，刻 tī in ê 心；我 beh 做 in ê 上帝，in beh 做我 ê 百姓。34 In 無 koh ták 人教示 in ê 厝邊，kap in ták 人 ê 兄弟，講，Lín tiòh bat 耶和華；因為 in tùi 大到細，lóng beh bat 我；因為我 beh 赦免 in ê 罪過，無 koh 記得 in ê 罪；這是耶和華講 ê。

### 共同經課 - 2 詩篇一百一十九篇九十七節~一百零四節

97 我疼惜你 ê 律法到怎樣 ah！我 thong 日靜靜想。98 你 ê 誠命常常 kap 我 tī-teh，Hō 我比我 ê 對敵 khah 有智慧。99 我比我 lóng 總 ê 先生 khah 通達；因為我靜靜想你干證 ê 話。100 我比老人 khah 明白，因為我守你 ê 教示。101 我禁我 ê 腳，一切 ê phái<sup>n</sup> 路無行；Hō 我 thang 守你 ê 話。102 我無偏離你 ê 判斷；因為你有教示我。103 你 ê 話 tī 我 ê chiū<sup>n</sup>-kiu<sup>n</sup> 到 joā 甜！Tī 我 ê 嘴，比蜜 khah 甜。104 我 tùi 你 ê 教示得 tiòh 明白；所以我怨恨一切 ê 斜路。

### 共同經課 - 2 詩篇十九篇

1 大衛 ê 詩；交 hō 樂官。1) Chiah-ê 天講起上帝 ê 榮光，穹蒼報揚伊 ê 手所做 ê。2 Chit 日 tùi hit 日發出言語，Chit 暝 tùi hit 暝傳出知識。3 無言無語；In ê 聲無 thang 聽見。4 In ê 準繩遍 tī 天下，In ê 言語到 tī 地極。上帝 tī in 中間為 tiòh 日頭安置帳房。5 日頭親像新 kiá<sup>n</sup> 婿出伊 ê 房，亦親像猛勇 ê 人歡喜走伊 ê 路。6 伊 tùi 天 ê chit-pêng 出，Séh 到天 ê hit-pêng；無一項物 khng 密，無得 tiòh 伊 ê 熱氣。7 耶和華 ê 律法齊全，能 hō 人 ê 心神活起來；耶和華 ê 干證確實，能 hō 人有智慧。8 耶和華 ê 教示正直，能 hō 人 ê 心歡喜；耶和華 ê 命令清潔，能 hō 人 ê 目矚光明。9 敬畏耶和華 ê 道理是清氣，永遠存在；耶和華 ê 判斷真實，一概是公義。10 比金，比 choē-choē 好金，khah thang 欣慕；比蜜，比蜂房滴落來 ê 蜜 khah 甜。11 Koh 你 ê 奴僕 tùi chiah-ê 受警戒；守 chiah-ê 有大賞賜。12 Chī-chūi 會知伊 ê 失錯 ah？求你除去我暗靜 ê 過失。13 求你阻止你 ê 奴僕，無故意犯罪；M̄准 hit-ê 罪惡管轄我；我就完全，免犯大罪。14 耶和華我 ê 石磐，救贖我 ê 主 ah；願我 ê 嘴所講 ê，心所想 ê，tī 你 ê 面前得 tiòh 接納。

### 共同經課 - 3 提摩太後書三章十四節~四章五節

14 但是你 tiòh 長長 toà tī 所學習、所深信 hiah-ê 事，因為知是 tùi 甚麼人學 ê；15 也知你 tùi 細漢已經 bat hiah-ê 聖冊，就是會 hō 你有智慧，tù 信基督耶穌來得 tiòh 救 ê。16 見若 hō 上帝默示 ê 經也有利益 tī 教示，tī 督責，hō 人歸正，引 chhoā 人學義理，17 hō 服事上帝 ê 人練達，便便來行 lóng 總 ê 好事。1 我 tī 上帝 ê 面前 kap beh 審判活人死人 ê 基督耶穌 ê 面前，為 tiòh 伊 ê 顯現 kap 伊 ê koh 來，2 吩咐你 tiòh 傳道理，無論得時不得時，tiòh 專務伊，用百般 ê 寬容教示來責備、警戒、勸勉。3 因為時日 beh 到，人 beh m̄容允端正 ê 教示，beh 耳孔 chiū<sup>n</sup>，ài 聽 choē-choē 先生，照家己 ê 私慾；4 koh oát 頭 m̄聽真理，去 òng 無影 ê 話。5 獨獨你凡事 tiòh 節制，忍受艱苦，行傳福音 ê 工，來盡你 ê 職份。

### 共同經課 - 4 路加福音十八章一節~八節

1 耶穌設一個譬喻，教示 in tiòh 常常祈禱，m̄-thang 厭，講，2 某城有一個審判官，無驚上帝也無對重人。3 Tī hit-ê 城內有一個守寡人 táuh-tauh 去見伊講，有人 kap 我做對敵，求你替我伸冤。4 伊久久無 beh；後來想講，我雖然無驚上帝，無對重人；5 但是因為 chit-ê 守寡人 táuh-tauh 來攪擾，我 beh 替伊伸冤，免得伊永永來苦楚我。6 主 koh 講，Lín tiòh 聽 chit-ê 不義 ê 官所講 ê。7 何況上帝揀 ê 百姓暝日喉叫伊，伊也為 tiòh in 寬容，kiám 無 beh 替 in 伸冤 mah？8 我 kā lín 講，伊 beh 緊緊替 in 伸冤。雖然 án-ni，人子到 ê 時，kiám beh tú-tiòh 世間有信 mah？